

**Bangsa Malaysia akan dihormati dunia kalau mampu lawan nafsu - Tun M
Astro Awani
6 Mei 2019
Hasimi Muhamad,**

PUTRAJAYA: Bulan Ramadan perlu digunakan oleh rakyat Malaysia khususnya umat Islam untuk mendisiplinkan diri dan menolak nafsu daripada melakukan perkara yang dilarang oleh agama.

Menurut Perdana Menteri, Tun Dr Mahathir Mohamad, rakyat yang mampu melawan nafsu pasti akan berjaya.

Katanya, beliau yakin bangsa Malaysia akan dipercayai oleh seluruh dunia jika rakyat negara ini boleh mengawal nafsu mereka.

"Apabila kita dikenali sebagai bangsa yang menolak nafsu, yang melakukan apa yang baik dan menolak apa yang tidak baik, maka seluruh dunia akan hormati kita. Dengan itu mereka akan berikan kepercayaan kepada kita dan kita akan dapat lebih banyak manfaat dan peluang untuk melakukan segala-galanya.

"Kita juga akan dapat naik ke pangkat yang lebih tinggi," katanya ketika berucap pada Majlis Perjumpaan Perdana Menteri bersama warga Jabatan Perdana Menteri, di sini hari ini.

Turut hadir Timbalan Perdana Menteri, Datuk Seri Dr Wan Azizah Wan Ismail.

Dr Mahathir berkata, bulan puasa bukan sahaja harus digunakan untuk beribadat tetapi juga untuk melatih diri untuk tidak melakukan apa-apa yang terlarang, termasuk rasuah.

Ujarnya, jenayah dilarang dilakukan tidak kira pada mana-mana bulan.

Beliau turut percaya rakyat Malaysia tidak mengira agama sedar tentang tujuan berpuasa yang seterusnya tidak akan mencemarkan puasa mereka.

"Bagi orang bukan Islam pun mereka tentu tahu sebab-sebab kita berpuasa.

"Mereka pun ada acara-acara puasa yang berlainan daripada kita tetapi tujuannya adalah sama iaitu mengawal diri daripada perbuatan yang dilarang," ujarnya lagi.

Pemimpin berusia 92 tahun itu turut melahirkan rasa syukur kerana masih boleh berpuasa dan diberi kesihatan yang baik.

"Kerana latihan mengawal nafsu ini tidak terhenti pada mana-mana masa dan menjadi satu latihan seumur hidup kerana dia akan membawa hasil yang baik pada diri kita sebagai manusia yang boleh dipercayai, yang apabila diberi tugas apa pun, akan melakukan tugas itu dengan sebenar dan jayanya," katanya.

Hari ini merupakan hari pertama umat Islam di seluruh dunia menyambut bulan Ramadan.

© 2019 Astro Awani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/bangsa-malaysia-akan-dihormati-dunia-kalau-mampu-lawan-nafsu-tun-m-206959>